

Paoro

Ka'karata

Iyoteparia

Teepotari

1 Kúíra ti'tijoe ooweru tiame, Karata ti'tiopachiami mochikame. Nee Paoroa, weratiame neea weratio, nape ki aata ti'tijoe, aataeo ki uhjuratiamenia ti'tijoeo; aata no'o weerakao Apoe Riosie Weratiame iintokamepua, Apoe Eesusi Noonora tiame, Apoe Eesusi oijenatekame. ²Neea yooma no'o ahjama Riosichi poponichitia mochikameo, pipinichitia tiame, i'ka iyosi iyotesa aamo uhjuriamenia, yooma Kaarasia weechiami mochikameopua ti'tiopachi. ³Neea taamo Noonos Riosio, Apoe Riosie Weratiameopua tiameo, ta'iria aamo erakoa mochitejeraninia iikachio. ⁴Apoe Riosie Weratiamea, taamowichio pejana mukukame puuua, taamo tatakoririao natetetiame itipimichio, yooma i'ka weechi ki ka'karuma nokiwachio, newipapuawichio; wa'a e'rakame taamo Noonos Riosia, yooma taamowichio. ⁵Riosio wa'a e'rariopa taamowichio, te'ta ki nu'uti iyoriwa te'teremete teemea, kiisi ki wahjiamesi ki nu'uti tiamee. Taamo Noonochi wa'a te'teresaa teemea, tísia kaawe enemapua.

Ki'tiame piirechi tuuyewaria, taamo newipateme tiamea

⁶¡Ai eeme! Kiisi pichikeme e'ramenia pu'ka aamo te'teria. ¿Kiisi tehpekosa toayame eemea, pu'ka Riosie aamo paajutetiao, aamo Riosie Weratiamechi paparamichio? ¿Kiisi tehpe toakamekosa eemea, te'ta aamowichio kaawe iintokameo? ¿Eemea ki tehpe sewina iikamepua, aamo kaaweruma tuuyewarikamera na'naritoaio? ⁷Piirechi tuuyewari newipaniamea, ki'tiamepua. Puu sewina tiame aamo masitiamea, oowera pichiwameka chaachapamepua,



*Paoraa Eesusichi paparamemo, utewaame
cheeka chapinurani. (1:13)*

eina nokaka
Riosie Weratiame
tuuyewario, sewina
aamo ijikimichiopua
pukachio. ⁸Nape
aaataoi sewina tiame
masitesoopua ki taamo
aamo masiteriachitia,
taamooio enesoo, Riosi
ku'iwarikooi tewekachi
eenakamekooipua,
pu'ka se'wi
masitiamechio neea,

te'ta Riosi kokosari ahjachi wichisaa, tísia kaawe enemiipua. ⁹Wa'a
cheekamekai eenechi wa'a aamo tuuyamenia, aaata se'wi masitiame
enesoo, ohso kaawe Riosie kokosatíaa, kaawe enemiipua. ¹⁰¿Aatana
kaawe eramichio no'o ihsíame maena eemea, ti'tjjoeriwichio,
Riosikamerawichiokosa? Ti'tjjoeri kaawe eramichio ihsíame
enesaania, ki Riosie Weratiamewichio ihsíame enemiinia.

Aatia tiachipa weratiame Paoroo

¹¹No'o nayewatuaa, Riosi inatarichi o'iniakamera ihsiamenia,
ki aaata ti'tjjoeri inatarichi eenamekamera, Riosie newipaniamechi
simiyamekamera. ¹²Ihji no'o nayewatuaa, Apoe Eesusi Riosie
Weratiame kiatiamenia, kiisi aaata tijoee, puuu Riosie Weratiame
i'ka wa'a tiame no'o inatapatekao, kihta aaata ti'tjjoee,
masitetiamenia. ¹³Eemea nane'rekamepa no'oo, pukeri simiyachio
achini ihsika no'o yasitoriopua i'isaerichio, neea pariserokaio
pehjó. Neea i'isaeri ti'tjjoerichio, tísia i'isaeri nokiwa yoorewa,
iyoriamekainia. Pu'ka taawechiamio neea, naanariamekai neea
Riosichi paparaka mochitoameo, sa'runanareka ahpo Riosichi
paparao. ¹⁴No'o wa'api isaerichiopua, epeche tiamekai neea,
no'o noonorie ehkoriai iyoriwa nokariame neesetowachio, epeche
ki no'o kekechuma tehtemarichitia. ¹⁵Nape neea wa'a
tiamekaio, ke'chu naawai Riosie uutiameneeramepua. Riosia
no'o weripasoopua, ahpo Taanae no'o paaekamepua, apochi
paparamichiopua. ¹⁶Waikao Riosia apoe wa'api no'o weerakamepua,
ki isaeri ti'tjjoerichi no'o nayewatumichiopua, ahpo kaaweruma
tuuyewariopua, ahpo Taanachi simiyame nayewatumichiopua
tiame, taamo tatakoriai newipatewa iintoriaopua. I'ka wa'a tiame
no'o wa'a iintotiameo, ki aaata tuuyekamenia. ¹⁷Wa'a o'iniio
neea seenepi Aarawia weechi simikania, ki aaata tuuyesaopua
pehjó Eerusareni simikao Eesusi ajawariachio, ke'chu Eesusi no'o

weeroi Eesusie ajawatiame. Aarawia o'iniao waikao, Raamahko eenakania eenechio, no'o o'inia simiriachio. ¹⁸Paika paamuparichi neipao, Eerusareni moonakania waikao Peero machimia Seepa tewaniameopua tiame, wa'a yasakania waikao oosa mariki aampa mariki taawe, ahjama nayewaka Eesusichi simiyameo aachin te'tewa. ¹⁹Wahjachi Eesusi ajawatiameo, ki tetewikania pu'kao; Saantiaoche machikania wa'ao, pu'kao Aakowo teewaemeopua tiame, Apoe Eesusi Paamira poonira. ²⁰Ihji no'o aamowichio iyotiaa, Riosi tetewachio, te'ta pichiwa puuua. ²¹Eerusareni o'iniao, Siiria weechi simikania waikao, wa'a o'inia u'matosao, Siirisa weechiami eenaka, wa'ami oikania waikao. ²²Wa'a no'o oioio Urea weechiami mochikamea, ki no'o machiyamea weemera enepakame Eesusichi paparameo, ²³oowera eee chaachapaniame no'o inamuka mochitoriaipua: “Nee, puuu pukeri taamo Eesusichi paparameo ko'inariameaio, apoepechi o'ineriatapua ehpeo, Eesusichi simiyame paparaniame masitekao, pu'ka Eesusichi paparaniameo pukerio, sa'runanariaio.” ²⁴Wa'a tiame no'o inamukapaopua, tísia kaawe erakoka Riosichio, ki nu'uti cheriwema ki'yarepua, Riosi iintoriawichioopua noochio.

Wahjachi Eesusi ajawaria Paoro uuna

2 Neipamionia, oosa mariki aampa naao paamupari u'matosoopua, wa'ami mehka weechiami masiteka yaajatoaio, eenechi Eerusareni eenakania, wa'a eenaiopa neea, Wenawe yeeka oiyamekania, Tiito tiame. ²Wa'a Eerusareni no'o simiriao, Riosie wa'a erapatetiapa wa'a simikania. Wa'a Eerusareni asisapaonia, wa'a tiopachi pa'pamiratoame ne'nemia simikania, no'o ki i'isaeri ti'tjoerichi no'o nayewaturia tuuyemia. Pu'ka pa'pamiratoameo yeetaeka mochiwaka tuuyekania wa'ao, aachin teeka masiterio no'oo, Eesusichi paparatekao, pu'ka tataroririao, Riosie cheriwepuawichioopua newipateka. Wa'a tiame tuuyekania pu'ka pa'pamiratoameo, nane'renariapa neea aatia chaachapamerikoopua, ki kaawe e'retiaapa, ki kihtawichio itipimichioopua ookapi ahka pu'ka pa'pamiratuamewichioo, no'o nayewaturiao. ³Wa'ao neea, utewa taamo yorapuame maeyainia siichitepuwachi simiyame taamo masitemichioo, taamoo Riosichi kaawe teerepuawichioo. Nape pu'ka wa'a tiameo, kihta no'o chaachapakapua. Tiitoai, Rieko tijoekaiopua ki isaeri, kihta noonotetiapua pu'kao, siichitepupuawichioo. ⁴Naatiche utewa chaachapakaipua Tiito siichitepupuawichioo, wahjachi ki paaetiai wa'achi muikame no'o pa'pamiratuame ahjama nayeioio. Puuua, taamo chaachapamia keepumia e'nakamekaipua, no'oo Eesusi Riosie Weratiamechi simiyame nayewamia. Puuukamera siichitepuwa simiyamekamera taamo masitemichio

utewa chaachapaipua, taamo eenechi Moise nuurari nokiwaetere nokisimichiopua. ⁵Nape neea no'o ahjama e'enakame tiamea, kiisi e'rakapua siichitepuwachi simiyameo, pu'ka Riosi tuuyewari aamo masitetiameo, wa'apitia itipimichiopua aamo masiteretiachitia, kihta sewinatatiame, Riosichi simiyame te'ta pichiwariraopua. ⁶Nape puuu Eesusichi ajawaria epeche yoorewachitia tetewiniameaipua, kihta aampachi sewina chaachapakapua no'o nayewaturiao. Noochio, puuu epeche yoorewa tetewiniameo, ki epeche weruma tiame tetewikania noochio, taamoo Riosio, wa'achitia napati taamo te'terio tuuyopa. ⁷Ohsofia puuu wa'atia kaawetakapua no'o naewaturiao, aapoe nane'rekapa Riosi wa'api iintoriopua taamo na'pa ajawakao, no'oo ki i'isaeri ti'tijoerichi simitemichio uhjurakapua naewatumichio, Peeroo, siichiteputiame ti'tijoerichi uhjurakapua nayewatumichio. ⁸Wa'a tiachipa puuu wa'api Riosi ihsiriopua taamo na'pa ajawakao, Peeroo, siichitepuwa nokiwamechi uhjurakapua pu'kao, no'oo, ki siichitepuwa nokiwamechi ti'tijoerichi uhjuratania. ⁹Wa'a e'erakosaapa, puuu te'ta pa'pamuratuamea tiopachio, Saantiaoa, Peeroa, Waania tiame, taamo ahjamina sekachi chapika no'oo Wenaweo tiameo, taamoo ki i'isaerichi uhjurakapua wa'ami nayewatumichio, wa'a ikisaopua, taamo kaawe teetonurekapua. Aapoe puuu pa'pamiratuamea, wa'api itipikapua waikao, i'isaeri ti'tijoerichi nayewatumia tiame. ¹⁰Naatiche taamo te'ta ki natekepamichio chaanekapua, tísia tooremuame ti'tijoeri ku'ipua, nape neea pu'ka ku'inarewachi simiyameo, tísia wa'api tiamekania ku'inarekao.

Paoroe Peero teriwa

¹¹Neipami Antiokía mochikaiopua, Peeroo wa'achi enasoopua, ki kaawe iintoriopua pu'kao, te'yakania pu'kao. ¹²Ihji Peeroa, ki i'isaeri ti'tijoeri nokayame ahjama koayamekai pukeri eenao, toakamepua pu'kao, pu'ka Saantiao na'naritoame wa'a e'enakame seewiapapua pu'kao, pu'ka ti'tijoeopua, tísia weemuamekopua pu'kao, siichitepuwa nokiwameo. ¹³Wa'a iintokopa Peeroo, wa'achi noonowisire wahjachiai, ookapi i'isaeri Eesusichi paparamelai, ahkasi Wenawei wa'achi iintosiriapua tiame, ki ahpo Eesusichi teerewakamera iintoka. ¹⁴Wa'a noonoikaopua pu'kao, se'wi ikikapua Riosi ka'karuma tuuyewarichio, neea wa'a noonoikopua pu'kao, yooma wa'a inamuachio, chaanekania Peeroo: “Nee, muuúa, uurio tijeokaiomua, ki uurio tijeochitia aamo uuyamepua, pu'ka aamo siichitepuwa nokiwameo, kihta nateyamechitia tetewapao. ¿Achinikai muuua ki nateyame tetewaimua siichitepuwao, ki uurio ti'tijoe amochitia Eesusichi paparakameo, siichitepunuranimua uurio ti'tijoe nokayachitia ohjoremichioopuá?

I'isaeri ti'tjoeria yoomahka wa'achitia, newipatetiame ahpo Eesusichi paparae

¹⁵ 'Muuua nee tiamea, isaeri ti'tjioe na'nawakamepua, pukaepa teemea isaeri ti'tjioepua. Pukaepa te'ta nane'reka mochitoame teemea, aachin teeka taamo Riosie cheriweniameo taamo tatakoririao, ki seesenu ti'tjoerichitia, ki i'isaeri ti'tjoeri. ¹⁶ Teemeai wa'a ahkasi ehpe taawechiami nane'rekamepua, pu'ka Moise nuurario, ki piipatiamekopua tatakorio, pu'ka nuurari yooraka mochitoniamero. Ehpeo nane'riame teemea, Eesusichikamera taamo paparakopa, piipatiamekopua taamo tatakoririao, kihta puuu ehkoriaami Moise nuurari nokiwae. Puuu ehkoriaami nokitiamea, aaataoi ki te'ta piipatekamepua tatakoririao. ¹⁷ Nape teemea Riosie Weratiamekamerachi paparawae i'yamekapa taamo tatakoriria te'ta piipatetiame, ¿te'ta piipakame itipiame ohjoare teemea taamo tatakoririao, ki siichitepuwa tiamekapa pehjiio? Wa'a tiame enesoo, ¿ki kaawejoare wa'a teesoo Eesusichi taamo paparaa? Ka'ii, kiisi wa'a tiame puuu. ¹⁸ Neeea toakamekai oochetiame nokiwao Riosichi kaaweruma te'terewachi enepakao, wa'a iintokamekai eenechi oochetiame nokiwamechi oowe erapasaonia, neekamera ki kaawe iintokame enemiinia. ¹⁹ Neeea Riosie Weratiamechi paparaeo, me'yakamenia oochetiame nokiwame noochi teereriaio. Puuu wa'api Riosi nuurari chiiiaa, kiisi no'o ahsepari e'wewa teerekopao apochio, no'o mukukamechitia ikiteka, Riosichi no'o poanatakamepua. Nape ehpeo neea Riosie Weratiamechi paparapao, pu'ka oochetiame nuurari ki no'o ahsepari e'weriawichioo, kihta kokosapuame neea Riosieo, Riosie Weratiame ahjama mukukameka tiipao. Wa'a tiiachio neea, Eesusi ahjama mukukame enesaa, Eesusi ahjama oijenakamenia tiame, weemera ahjari iinuepakaopua, Riosikamera yorakeka yasitomiapaopua. ²⁰ Ehpeo neea Eesusi ahjama mukukaio Eesusichi oijenakapao, no'o weemera ahjari Eesusichi ahjariaa, Eesusie teetoamenia, apoe Eesusikamera noochi yasitoamekopua. Wa'a tiiachipa no'o weerewao ki nooe teetoamepua, Riosie Weratiamekamera no'o teetoamepua, apoe tisia no'o nakiyapa, no'owichio mukuriopa. ²¹ Wa'a iintokao neea, kiisi wehchi ipaka tetewikamenia, Riosi no'owichio iintoriao; aaata Riosi nuurari e'weka newipaniame enesoo, kihtawichio mukukame enemii, Riosie Weratiamea.”

Riosichi kaawe te'terewa nayewaniame

3 ¿Ai eeme Karata ti'tjoeri, kiisi ijinatame eemea! ¿Aatana ihsikame aamoo wa'a ikitekao? ¿Ki ma'chiamekosa aamo chaachapakame teemea, Eesusi Riosie Weratiameo kurusichi meritiamekopua pu'kao, yooma tetewachi meritiamekoo, aamokamera kaawewichio meritiamekoo? ² Ehsoo aamo

iinatuketaone: ¿Achini teeka amochi uukame eemea Riosi Riosiwario, ehkoriaami Riosi nuurari nokiwarichio, naatichikosaoipua, weemera Riosi kaaweruma tuuyewarichi paparakopakosa? ³ ¿Rooroikamekosa eemea naaju? ¿Eemea ehkoriaami nuurari nokiwa na'pepakosa epeche aamo kaawe teeremio maayame eemea Riosichio? ¿Ki Riosi Riosiwariékamera o'inekame eemea, Riosichikamera aamo kaawe aamo te'terepuawichioo? Wa'a teesoo, Riosi Riosiwarie aamo o'ineriaekamera te'teretomeriaipua, ohso kaawe. ⁴ Ihtanawichio kaawe enekamepu, yooma ki ookapi itapitia, Riosi Riosiwarie aamo ku'iretiaa, ¿kihtawichiokosa kaawe enekamepua, seenekachio pu'kao, kihtawichio kaawe eneka itipikame enesoo? ⁵ ¿Naakonakosa Riosia, aamo ehkoriaami yoorariokopa, aamo ki'yakamepua ahpo Riosiwario? ¿Ki Riosi tuuyewarichikosa pichikekopa, aamo ki'yakamepua, ahpo Riosiwario? ⁶ Wa'achitia Aurani ehkoriaimiai, Riosi paparakapa, kaawerumachitia tetewitiamepua Riosieo. ⁷ Wa'a teesoo, te'ta Riosichi paparaka mochikamerapua, te'ta Aurani tatanarachitia tiamera, ma'chiamé wa'a tiame puua. ⁸ Ehkoriaamio Riosia cheeriaipua Ehkoriaami Iyoterichio ki i'isaeri ti'tijoerioiopua tiameo, apochiche paparakopa, piipakame tetewimo tuurepua tatakoririao. Riosia Ehkoriaami Iyoterichio eee cheeka nayewerepua Auranio: “Neeea aamo tetejimarisiwachi aaata iintomiaeo, yomatiamé wehjoarichi ti'tijoeriooopua ooweruopua tiaméo, amochitia te'ta noochi paparakameopua, cheriwemania tatakoririao.” ⁹ Wa'a teeresoo yooma puuu Riosichi paparamea, Auranichitia papariaopua, kaawe yorapuame puua Riosieo, tatakori cheriwekao. ¹⁰ Yooma puuu Riosie Moise kiaretia nuurari ahsieme e'weka ahsepanariameapua Riosi cheriwewao, Riosi kokosaritere itipimerapua, ki yooma ahsepakapa yooraka Riosi nuurario. Wa'atiame iyotetiamepua Ehkoriaami Iyoterichio, eee cheeka naewakaopua: “Yooma ki ahsepaka yoorakame Riosi nuurarioopua, Riosi kokosaritere itipimeriche puua.” ¹¹ Ma'chiamé taamo chaaneniamepua, nuurari chiia yoorarichio, aaataa ki piipakame tetewipuakopua Riosieo. Wa'achi chiioa Ehkoriaami Iyoterichioopua tiameo, eee cheeka: “Aaata Riosie kaaweruma enepatetiamea, te'ta piipatetiamea ahpo tatakoririao, weemera ahjari kiapuamepua ki wahjiamesi, Riosichicheo, paparakache.” ¹² Nuurari chiia nokiwamea, kihta tiamepua Riosi paparaichioopua; puuu nuurari chiiaa, oowera ahseparika e'wepuameche nayewamepua, eee chiipapua: “Riosi nuuraritere yasitonariamea pu'ka e'weka nokiwa yasitokao, wa'api teetomeripua piiripioi ki se'wiche yorasika, Riosi nuurario.” ¹³ Riosie Weratiamea, ahpo taamowichio kurasichi mukuriae taamo newipatekamepua, pu'ka nuurari chiia taamo Riosie kokosapuameo, cho'wepaka; i'ka eee tiame Eesusi ikimiao, Ehkoriaami Iyoterichi, eee chiamekopa:

“Kurusichi meriwamea, tísia na'aramechitia meritiamepua.” ¹⁴ Ihji Riosie Weratiame iintoriaa, Riosi Aurani tísia kaawe iintokemo tuuria puuua, Aurani tetejimarisiwachi naawakamee. Eesusi Riosie Weratiamea kurusichi taamowichio mukuriaa, Riosi Aurani iintokemo tuuria puuua, yomatiam weechi mochikamewichio, ki i'isaeri ti'tijoerichewichio. Ehpeo yooma aata Eesusi iintoria aho pejanawachitia uukamea, Riosi Riosiarira apochi yasitoamepua, te'ta Riosi cheerichitia ehkoriaami o'iniaa, iintomo tuukao.

Riosi nuurari ki Riosi Aurani iintokemo tuuriachitia tiame


¹⁵ Ehpeo neea wa'achitarichi aamo nayewemania, itapiti aata toowenarewa mukusao: Wee, aata tijoea oowitiameai, aata toenariame mukisaa ihtoi aho iinuekao, iyosichi iyotesa tooweniamepua. Pu'ka iyoterichi tooeka tooetiameo, aataeoi, kiisi sewinatapuamepua, epechetakaoi ki epechetakaoi. ¹⁶ Wa'a iintokame Riosia, ehkoriaami taawechio, ti'tijoeri tatakoria ahsieme cho'wepuo tuukao, ooka aata iintokemo tuuriaio. Piiripi puuua Aurani enerepua, piirea aata Aurani tetejimarisiwachi naawameri, neipa wahka ihtoriachio. Aurani iintokemo tuuriaeopua, aata Aurani tetejimarisiwachi, naawameri nayewaka cheerepua. Ki muuwaeme Aurani tetejimarisiwachi naewaka cheerepua, aata weeka maaepoiopua, piiripi wa'apiche naewaka cheerepua pu'kao. Puu piiripi aata Riosi cheeriaa, Riosie Weratiame puuua, apoe enameri eenakamepa. ¹⁷ Pukachi simiyame no'o ma'chitanariaa, ihjipua: Riosia Aurani ahjama katewiaio, aho iintokemo tuuriaio, te'ta pichiwa wa'a iintomo tuurepua, kiisi wehchi wicheka. Pukaepa Riosi Aurani cheeriaa, ka'chitia taawechi sewinatatiamepua Riosi nuurarieoi, naa sientoi piire weerewa aampa oosa mariki paaumpari neipami, eenakameaipua nuurari, Moise Riosie kiaretiaa. ¹⁸ Wa'a tiachio, Riosi nuurari Moise kiaretiae yooreka, cho'wepuame enesoo taamo tatakoriaio, kihtawichio nateriame enemii, Riosi Aurani apochiche paparariae, tatakoria cheriwio tuuriaa, kihta itapiti yoorari natekachiopua. ¹⁹ Wa'a teesoo, ¿ihtanawichio yachatiame enerepu Moise kiatiame nuuraria? Puu Riosi nuurari Moise ki'yariaa, Riosie ahjae wenenejimichio enerepua, ki kaawe noonotiame ti'tijoerieo. Nape Riosie kiatiameapua nuurari, animari kosoka aho cheriwepuawichio tatakoriaio, aata Aurani tetejimarisi teetowachi eenachisi wa'a teeremeri eneriamepua. Puu wa'a tiame teeretoniam, ahkasi Aurani tetejimarisiwachi naawachisi wa'a teeremeri eneriamepua, pu'ka Aurani tetejimarisiwachi enamerichio Riosia pu'kao, tísia kaawe iintomeriko tuuriamepua, yooma pukachi paparariao, tatakoria cho'weneka. Riosia pukeri aho nuurari ki'yaiopua ti'tijoerio, pahchao Moise ki'yakamepua pu'kao aho

tewekachi ku'kuiwáeo, neipao Moisea, ti'tijoeri u'yeparepua pu'ka nuurario, yooreka mochitomichiopua. ²⁰Nape Riosia ahpo iintomo tuuyaio, aaata Aurani tetejimarisiwachi naawamerichio, ki aaata piirechie chaanepua nakiriamepua. Riosia pu'ka aaata cheeka nayewario, ahpo Taana i'ka weechi tijoe tijoetumerio, apoeko tuuka cheeriamepua; ka'chitia ooka tiamekapa Riosia.

Aatia tiachipa Riosi nuurari yachatame

²¹ ¿Riosi nuurari e'weniamea, Riosi iintomo tuuriachitia tiame, wa'achi tiame ohjoarepua, Riosichi kaawe te'terepuamewichio? Ka'i kiisi wa'achi ahpo te'tiamepua. Wa'achi tiame enesoo, Moise nuurari e'weka mochitoio Riosia, taamo weemera ahjari kiamiipua, taamo apochi kaawe te'tereka mochitopao. ²²Nape Riosia Ehkoriaami Iyoterichio, yooma taamo tatakorieme teewamepua, ki ahsepari taamo e'wiamekopao, ahpo nuurario. Wa'a tiachipa Riosia, ahpo Taana taamo uhjurerepua, pukachi paparaka taamo piipamichiopua taamo tatakoririao, pukachi paparaka tiameo, taamo teimichiopua weemera ahjario, te'ta apoe Riosio wa'a iintokemo tuuriao. ²³Ke'chu eenoi Riosie Weratiameo taamo ahjachi paparamerio, Moise nuurari chiiia, taamo chapika yasitoame eneriaipua pehjio, ahkasi Eesusi Riosie Weratiame eenachisi, pu'ka nuurarie taamo kokosapuameo, ahpo mukiwae taamo pejana cho'wepuachisi. ²⁴Puuu oosa mariki aampa ooka nuurari chiiia, puuu animari ko'yaka Riosichi oowewaa, ahpo tatakoriria cheriwepuawichio, ahpo masitewatere taamo teeretokamepua, kukuchi nu'nunti masitiamechitia, taamo ki kaawe iintosoo pu'ka nuurari ki e'wesoo, Riosi taamo kokosamerikopua. Wa'a teetokame teemea pu'ka Riosi nuurari Moise kiatiamechi

teetoka mochitokame teemea, ahkasi Riosie Weratiameo tamochi eenariachisi. Ehpeo Riosia weechi tekisaopa tijoechitia tijoetukao, ahpo Taana Eesusi weerewachi enepakaopua, pukachi iintokamepua yomatiame ti'tijoeri apochi paparamero, ahsieme ti'tijoe tatakoriria cho'wewaopua ooweruopua tiame. Puuuu, ahpo kurusichi mukiwae natetekamepua pu'kao, ehkoriaami animari Riosi oowewarichitia ko'yéka. ²⁵Ehpeo teemea wa'asio, taamo



*Ehkoriaami Riosi oowewari
nokiwa, Eesusia Riosi
ahpokamera oowewarichitia
kurusichi mukuria. (3:24)*

Noono ahpo Taana Eesusichi wa'a tiame taamowichio iintoriopao, ki Moise nuurari masitewatere mochitoamepua, Riosi masitewatere mochitoamepua, apoe te'ta inisiamepua taamo neesetokao, apoe tewekachi kahtiame taamo Noono. ²⁶Eesusi Riosie Weratiamechi paparopao, Riosi taamo Noono tewekachi kahtiamea ahpo tatana taamo enepatekamepua. ²⁷Eemea Riosie Weratiamechi paparapao, Riosie Weratiame ahjama pirenatukamepua, Eesusi Riosi Riosiwariie paatotiamekapa, pu'ka Riosiwari wakiraeka aamo neesetoame eemea. ²⁸Wa'a taamo iintokapa Riosia, ahpo te'ta tatanachitia taamo tetewamepua, yooma taamo apochi paparamo, wa'achitia napati tetewaka, pe'yachi isaeri ti'tijoetukamekoipua, riekto ti'tijoeturikooiopua, teekoemekooi, ki teekoemekooiopua, tijoekooiopua, oowitiamekooi. Yooma wa'a te'tiapaopua teemea, Riosie Weratiamechi pirenatupakamekapao, piiripi wa'api enepakame teemea, Riosichio. ²⁹Yooma Riosie Weratiamechi te'tiamea, Aurani tetejimarika tiame enepakame teemea, Aurani tetejimari enepakapao, yoomahka iinueme teemea kiapuao, Aurani Riosie kiapo tuutiameo.

4 Nape neeea, pu'ka nuutewachi simiyameo, kaawe aamo ma'chitanarenia neeea. Aataai pukeri weweripao, ki sewina te'tiame eneriai teemea, aataai ta'pechi tekipanameopua, yooma ahpo iinuwakoi, ahpo noono tooeriaopua. ²Ihja, aata neesetorichi yasitoamepua pehjo, ahkasi ahpo noono cheeriachisiopua, kiapuameopua ahpo iinuwa toeretiao. ³Wa'a te'tereriai teeme i'isaeri ti'tijoeria, Moise taawechisi wa'anao, kukuchi nu'nuntika te'tereriai teemea, pu'ka oochetiame nuuraritere nokiwa, ti'tijoeri tatakoriario cheriwewa teewesiwachio, ki nateteniameopua pehjo. ⁴Wa'a te'tereniame teemea ahkasi Riosi e'raria taawechisi, waika asisoo, apoe wa'api oowitiamechi naawarepua weechi tjoerichitiao, wa'a iintosaapua ahpo wa'apio, apoe wa'apikaioopua, ahpo Taana teewarepua; wa'a ikisaopua pu'ka ahpo Taana teewario, ti'tijoeekachimi uhjuraropua, ahpo tisia kaaweruma tuuyewari nayewatumichio. Riosia pu'ka taawechiami ahpo Taana ti'tijoeekachiami uhjuroio, teemea Moise nuurari nokaka mochitoriaipua pehjo. ⁵Nape Riosia ahpo Taanachitia eenakaopua, wa'asi weraparepua, Moise nuuraritere nokiwameo. Riosia pu'ka Moise nuuraritere nokiwa wa'asi werapasaopua, ahpo mukiwae yooma taamo tatakoriaria ahsieme natetesaopua, ahpo tatana iintapakamepua taamoo. ⁶Ehpeo Riosia, aamoo ki i'isaeri ti'tijoerikoio, te'ta ahpo tatana iintapakapao ahpo Taana Riosiwari, aamo iikachi yasipateropua. Wa'a te'terepatiaapa eemea Riosieo, aamo Noono nayewiaio, Riosi kukuchiwarachitiao: “i'No'no, no'o No'nola!”, chaachapamepua Riosio. ⁷Wa'a ikitiapa muuua ki seenu

muuua Riosi tetejimarichio. Muuua te'ta Riosi taanarakapao, Riosi aamo Noonoe kiapuamepua, yooma ihta ahpo taana kianiameopua, yooma ihta Riosie aamo kiapuame nuutekiao.

Paoroe Eesusichi paparame inataniame

⁸Eemea, pukeri ke'chu Riosi machiyaiopua pehjo, itapiti aamo ri'riosiwatae, chapitiame mochitoriaipua, pu'kakamera aamo riositewa e'weka. ⁹Nape ehpeo eemea, Riosichi mochikai eemea, ohsotiao Riosikamera amochi kahtioiopua, ¿achini iikai eenechi pu'ka aamo chapitiametere mochitonare eemea, pu'kao kihta aamo ki'yamekoipua aamo Riosichi kaawe te'terepuao? ¹⁰Eemea pehjo, aamo kaawe te'teremichio Riosichio, ihtaohi taawechioi iyoriweka pahkotamepua, ihtaohi paaumpari paamuniachioipua, ihta mechachioi iyoriweka pahkotiamepua, ihta taawechioi iyoriweka pahkotamepua. ¹¹Tísia seewenania amochio, no'o tehkio amochio, kihtawichio kaawe eneriameko e'rakao. ¹²No'o Riosichi poponiwa pipiniwa tiameo, neea aamoo utewaeme aamo chaanania, eenechi noochitia utewaeme paparaka mochitomichioipua Eesusi Riosie Weratiamechio. Neea amochitiao toakamenia no'o pukeri o'inia teereriao, Moise nuuraritere nokiwameopua. Eemea aamo no'o masitia toayaio, ki no'okamera ki kaawe ikitiamepua, eemekamera ki kaawe ikiyamepua wa'a nokakao. ¹³Nane'riame eemea, pukeri wa'a aamo no'o nayewaturioipua Riosi tuuyewario, no'o kokoriame oiriopua, waika taawechiamio. ¹⁴Wa'a tiapa neea, tísia tehki teeretoka aamo masitekamepua wa'ao, nape neea amochio kaawe e'ramenia, kiisi no'o nahsineka tetewikamekopua, kihta no'o ipaka. Ohsokamera kaawe no'o uuka tetewikame eemea, no'oo Riosie aamo tuuyemichio uhjuratiamechitia, no'oo Eesusichitia tetewika, apoe Riosie Weratiamechitia uuka. ¹⁵¿Ihtana ijikikame eemea pu'ka no'o aamo masiteria pu'sererio, no'o Riosichi simiyame kaaweruma aamo masiteriao? Wa'a no'o ihsioio no'o masitekao, tisiwa kaawe erakoameai eemea, ahkasioi aamo puusioi ma'chipasa, no'o yahcheme erakokameai no'o tísia aiwame tetewapa no'o kokoriopao. ¿Ihtana ijikikame eemea naaju? ¿Achini iikai wa'a noonokame eemea? ¹⁶Neea aamoo, aamo toayame inamukame neea, aamo ka'karuma tuuyewari Eesusichi simiyame nooe aamo masiteriao. ¿Kikosa eemea no'o aamo masiteria ipaka tetewapao, aamo seepurawachitia no'o tetewamepua, no'oo, te'ta pichiwari Eesusichi simiyame aamo masitekamekaiopuá? ¹⁷Puuu wihkueka aamo masitiamea, tísia kaawe aamo yorakio chaachapamepua chaachapao, nape ahpo iikachio, kiisi kaaweruma erakoai chaachapamepua. Puuua oowera wa'a aamo chaachapamepua, taamo poanatuawichioipua, apochikamera te'terepuawichioipua. ¹⁸Wahjachi kaawe nayeweniamea, kaawerumapua kaawerumao, nape kaaweruma inataka

chaachapatiame enesoo. Neeea mehka kahtiaio, senepi taawechi wa'a tiame kaawe e'raka aamo nayewenariamenia nayewiao, nape ka'chi ikime wa'a e'rio, tísia iikachi kokoreka inamuamekapa pu'ka aamo nokayao. ¹⁹Eeme no'o noonolawaka te'teriamo Riosichio, tísia kokorenania wa'a aamo nokayopao, ahkasioi saumerichitia kokosa tiame saayamenia noochio. Ahkasi wa'a teeremeri neeea iikachi kokorewa aiwakao, ahkasi eenechi Riosichi aamo kaawe teerepachisiopua. ²⁰Ehpe wa'api aamo mochikachi yasisaa tísia kaawe eramiinia, tísia kaawe e'raka no'o aamo nayewemiaoopua; nape mehka kahtiapa neeea, ka'chi ikime e'raninia wa'a e'raio.

Aachin teereria Aurani ooka tatanarachi

²¹Eeme wisikuari masitiamechi uumpanariamea, ¿nane'riamena eemea Ehkoriai Iyoteri chiiiao pu'ka masitia Moise nuuraritere mochitoniamero? ²²Wee, Aurani ooka tatanarachi teerekame, pu'ka wa'achitarichi aamo kaawe tuuyemania aachin teereriae pukachio. Ihjia eee teereriaipua: Piiripi puuu Aurani taanaraa, Aakari tewaniame oowitiamechi taanatatiame eneriaipua, puuu oowitiamea Aurani ta'perachi puhkuchitia yasakame. Piire Aurani taanaraa, Aurani te'ta uupirachi naawakame puuu, ki puhku oowitiamechi. ²³Puuu puhkuchitia kahtiamechi naawakamea, aaataoi taanataniamechitia, tanatiamepua. Nape ki oowitiame puhkuchitia yasitoamechi naawakamea, Riosie taanaepo tuutiapa, taanaetiamepua. ²⁴Ihji ooka Aurani tatanara te'teriaa, ooka Riosi kateweri iintotiamepua, Riosie ti'tijoeerichi katewetiamechi simiyameo. Piiripi ihji ooka kateweria, Riosie sinai kaawichi Moise kiatiamepua. Puuu kateweria, Aakari oowitiamekaitepua, Aurani ta'perachi puhkuchitia yasakame. Yooma pu'ka Moise kiaretia yooraka mochitoamea, Aakari tatanarachitia te'tereniamepua, pu'ka e'wewatere mochitoapa, pukae chapitiame. ²⁵Ehpe taawechi Eerusareni mochiwaria, Sinai kaawika tiamepua Aarawia weeechi weeriamo. Ihji i'ka weeechi Eerusareni i'isaeri mochikamea, iiweta simitiamepua pehjo, Riosie Moise kiaretia nokaka mochitopuame, pu'ka nokiwame puhkurachitia te'teriamepua pehjo, pukae chapitiame te'teriapua pehjo ehkoriai Aakarichitia. Yooma ihji i'isaeri pu'ka nokiwa masitiamea, yooma puuu aaata masitiao, pu'ka Moisee nokisitewa puhkuchitia enepatiamepua, apochitia te'teria. ²⁶Nape Aurani uupira Saara teewaeriamo, tewekachi Eerusarenikaite puuu, te'ta weemera Eerusareni, ki pusie tetewiniame pehji. Puuu Saara Riosie tuutiame taanaremioo, taamo yeeyekaitepua Riosichio. Yooma pu'ka Saara Riosichi tatanaraka te'teriamo, tewekachi Eerusareni taamo mochiwaripua. Wa'a tiachio yooma teemea, pu'ka Saara tatanaraka te'tiame teemea,

Riosie iintomo tuuria pichikekapa ahpo Taana Eesusichi iintomo tuuriao. ²⁷Ehkoriami iyoterio pu'ka Saara ooitame nayewakao, eee chaanekamepua pu'kao:

Peenia erapa muuuu, muuu ki taanatamea,
kaawe e'raka sisinamitiamua,
muuu ki sauka kokosa aiwakamea.

Muuua ki tatanatameai,
epeche tatanaemeri muuuu,
ki aaata oowitiame tatanatamechitiapa.

²⁸Ehpeo no'o Riosichi poponiwaka te'tiamea pipiniwaka te'tiamekaapua tiame, Ihsa teereriaka te'terame teemea, Ihsaa, Riosi iintomio tuurewachi naawakamekapa. Ehpeo teemea Ihsa Riosi iintomo tuurewachi naawakamechitiao, Saara tatanara teemea, Riosi taamo iintokemo tuuriachi paparakapa mochitoamekapapua, Auranichitia. ²⁹Puuu Aakari taanara Ihmaéri tewaniamea, oowera tijoe naawachitia naawakamepua, nape Ihsaa Riosi Riosiwari taanaretewachi naawakamepua, Riosia Auranio, Saara iintokemo tuuriachitia. Wa'achitia waika taawechiamio, Ihmaéria na'arerio Ihsao, wa'achitia teemea Riosi Riosiwari naawakamea, na'areniamie teemea, ki apochi ijinuemeepua Riosi Riosiwario. ³⁰Ne'nemitiaopua Ehkoriami Iyoterichio, aachin tiamekopua i'ka ooka tatanareniachiopua: “Saaraa chaanerepua Auranio: U'mapumitia muuuu, i'ka oowitiame puhkuchitia taamo ta'pechi ohjoemeo, taanara tiame. Puuu oowitiame taanaraa, kihta kipotepuamepua aamo taana tooemiamieopua aamo iinuwariao.” ³¹Wa'a teeresoo teemea, ki pu'ka oowitiame puhkuchitia yasakame tatanaraka te'terame teemea, Saarakamera tatanarakameka te'terame teemea, Riosi Riosiwari weemera naawakamekapapua, Riosichio.

Puhjetiamie mochiwa oochetiamie nokiawo

5 Teemea Riosie Weratiameo, puhjetiamie teemeapa oochetiamie nokiameo, pu'ka Riosie Moise nuuretiao, utewachi ki ookapi taamo e'wepua nuurewaopua. Ehpeo kaawe aamo inateka mochtupapua, ka'te eenechi pu'ka oochetiamie nokiwatere mochtomitia eemea, aamoo itapiti utewachi nokitiameopua, itapiti oisi yoomuame kutamochi puritiame tekitoamechitia. ²Kaawe keepumitia eemea i'ka aamo chaaneniao. Nee Paoroa, aamo tuuyeka chaaniamie neea, eenechi pu'ka siichitepuwa nokisiasa eemea, Riosie Weratiame iintoriaa, kihta nateyame enemapua aamowichio. Riosie Weratiame aamowichio pejana iintoriaa, kitachi kaawewichio itipimapua tiameo. ³Pichiwa aamo chaanenania i'kachi simiyameo, aaata siichitepuwa ihsinariamea ahpo tatakoria cheriwepuwawichio,

yooma ahsepari e'wewa yorametepua Moise nuurari nokiwaopua. ⁴Eemea pu'ka Moise nokiwatere mochitonaresaa Riosichi kaawe te'terepuawichioo, poanatokame eemea, Riosie Weratiamechio, wa'a te'teriapao eemea, kiisi uuka mochimeri eemea Riosie aamo te'ta nakiwao. ⁵Nape teemea uukamekaopua Riosi taamo nakiyao, Riosi Riosiwarioo kaawe e'raka mochitoame teemea, yooma Riosie taamowichio iintomo tuuriao, ahjachi erakokaopua Riosie taamo kiapuamekoo. ⁶Riosie Weratiamechi ahjama enepatioopua taamoo, puuu siichitepuwa nokiwamea, kihtawichio nateyamepua taamowichioo, pe'yachi ki siichitepuwa nokiwaio. Riosie Weratiamechio, paparaniakamera, te'ta nateyamepua, Apoekamera te'ta taamo nakika pejana mukukamekopa, teemea Eesusio ahpo taamo nakiyachitia, wa'achitia taamo nakika mochitomichioopua i'ka weechio. ⁷¿Achini ijikiru eemea, aamo kaawe te'teretoaio? ¿Aatana aamo sewina erapatekame aamoo, ki e'waka mochitomichioopua, te'ta pichiwari chiiameo? ⁸Ihji sewina aamo ijikiriaa, ki Riosichi eenamepua, Riosio ahpo Taanachiche paparamichio aamo paaekamekopua. ⁹Nane'reka mochitopuapua, pu'ka aamo se'wi erapatiamechiopua, puuu ki kaaweruma aamo erapateniamea, rewaruraka ihsiamepua amochi muipakao, ti'tijoerio eee chaachapawachitia: “Ku'ita rewarurakaio, yomatiamie paatusichi mu'ipamepua.” Pukaepa tisia kaawe aamo neesetomitia eemea pu'ka ti'tijoerichio, ki rewarurachitia amochi ikimichioopua, pu'ka ki kaaweruma masitiao ki amochi mu'ipamichioopua mehtapakao. ¹⁰Nape neea Riosichio ahjachi e'ramenia, ki amochi mehtamichioopua pu'kao, aamo sewina erapatekao; puuu aamo sewina erapatiamea aataai, ki wa'atia itipimeripua Riosi kokosarioo, pe'yachi aataai enema. ¹¹No'oo siichitepuwachi simiyame no'o masitiame enesooopua pukeri no'o o'ineriachi o'inia, ti'tijoeri Riosie kaawe tetewipuawichioo, ki no'o nekamuchemii i'isaeri ti'tijoeria; pu'ka siichitepuwachi simiyame no'o masitiame enesoo, puuu Riosie Weratiame taamowichio mukuriamechi simiyame no'o masitiaa, ki eina teeremiipua i'isaeri siichitepuwachi simiyame masitiamewichioo. ¹²Puuu aamo sewina erapatiameopua Riosichio, aamo siichitepuwa nokiwa nokijeramea, jte'ta yomatiamie ahpo tehpunasaapua, kaawe enemiiipua ohso kaawe! ¹³Eeme Riosi ijinuwa enemichio paaetiamea, poanatuapua pu'ka ehkoriaami nokariamechiopua, Moise nuurarichio. Poanatuapua tiameo yooma ihta ki ka'karuma erakowaopua, ka'karumakamera erakoka mochitopuapua ohso kaawe, kaawe aamo nakika tetewipuapua, te'ta aamo nakirae. ¹⁴Puuu Riosi nuurari chiiiaa, piiripi naawesarichi ahsieme chiiamepua nokipua, puuu ihjipua: yomatiamie Riosi yooreniamea, piiripi naawesarichi ahsieme nuurari puuuu, eee chiiame: “Aamo wa'api

aamo nakirewachitia, wa'achitia nakipuapua aamo piirechioio.”

¹⁵Pukaepa kaawe aamo inateka mochitopuapua, aamoe wa'api aamo na'ara nokaka mochitosaa eemea, aamoe wa'api aamo soopameripua.

Taamo ki kaaweruma ikotuwa

¹⁶Pukaepa eemea, ohso kaawe Riosi Riosiwari nakiyachitia mochitopuapua, ki aamo a'chi tiame erakoa nokaka. ¹⁷Ki kaaweruma ikotuwa tijoechio oowitiamechioio, Riosi Riosiwari kaaweruma e'rachi nasiwamepua; Riosi Risosiwari kaaweruma e'raria, tijoeoo oowitiameoioo, ki ka'karuma ikotuwa erakoarachi nasiwamepua. Puuu ti'tjioeri ki kaaweruma ikotuwaraa, ki wahjiame nasiwari tiamepua, Riosiwari kaaweruma ikotuarichiopua. Pukaepa yooma eemea, aamo inatarichio tísia tehki erakomepua, aamo kaaweruma yorapua uumiao. ¹⁸Eemea Riosi itanemetepua ku'iwao, Riosi Riosiwari aamo ma'chiamie tetewitemichiopua, ki kaawerumakopua pu'ka ki ka'karuma masitia na'naritoniamieo, Moise nuuraritere mochiniamieopua ehkoria misi nokiwameopua. ¹⁹Puuu ti'tjioeri ki kaaweruma ikotuwaa, ma'chiamie tetewiniamepua ihsiamekoo, ihjichitia: suwepori nokinarewa, ewipuame nokinarewa, ki kaawe nokinarewa siintoka, ²⁰itapiti netetiamechi riosienaretewa, siporewa nokinarewa, nekumekache mochitonarewa, ki kaawe erakoa mehtakache mochinarewa, wa'inakache mochinarewa, nekakokache mochinarewa, ki ihkokeka mochinarewa, seepurewatekache mochinarewa, naasipasi poanaturarewa, pirenachi pirenaturichi enepanarewa, ²¹piirechi iinuekachitia ikotuka yasinarewa, nawajinarewa, siinto pahkochi oinarewa, yooma ihtaoipua wa'a te'tiameo. Aamo inateka mochinurakai pu'ka wa'a tiame ikotuwao, eenechi aamo chaaniamenia, kaawe aamo inatepuapua. Yooma wa'a tiame nokayamea ki reesisepuamepua, Riosi ye'karichi mochipuawichioo. ²²Riosi Riosiwaria, iikachikamera taamo ku'yamepua taakekao: nakiwari, peenia erakori, ta'iria yasira e'rari, mooena tiioi kaawe e'rewa, kaawe e'raka ku'iwa, kaaweruma eneniamie ti'tjioe ooweru tiame, ahpo iyorimiache ihsiame, ²³tesiw e'raka tetewiniame, ahpo na'ara ihsinarewao wa'iname. Yooma i'ka iyorika yasitoamea, kihta tiamepua ahpo ki kaawe iintorio chaaniamieo, ihta nuurarioi iyoriwaopua. ²⁴Riosie Weratiame ijinuwaraa, me'yakamepua ahpo ki kaaweruma eratioo, te'ta ikotuwa eratiamerao. ²⁵Teemea taamo weemera ahjarichio, Riosi Riosiwari ku'iwae mochitoame enesaa, Riosi Riosiwari taamo neesetoka panitotomete teemea. ²⁶Kiteremete teemea tamochio, epeche weruma ahpo erakoniamieo, ihtaoi ki iintomete teemea taamo ahpochi nenekaniameo; aaataoi ki ahpo ikotukemete teemea wa'achi teerenarekao, ihtaoi itapiti wa'achitia iinuenarekao.

Ahpo ku'ika mochtipuame

6 Eeme Riosichi poponiwaa pipiniwaa tiamea, aaata pooniwa piiniwaoi eenechi ki kaawerumachi wichikame enesoo, muuu kaawe oiyameapa Riosichio, kaawe e'reka ku'ipuapua pu'kao, sosopatiame nayeweka, eenechi kaaweruma pooechi enepatepuapua. Nape pu'ka tuuyeka ihsiaio muuuu, kaawe aamo inateka ihsipuapua, seenekachi wa'achi iintotare muuuai, se'wi wichikaopua ki kaawerumachio. ²Pukaepa eemea, kaawe aamo neesetoka mochtipuapua, ki itapiti ki kaawerumachi aamo ruhjipuawichioopua. Kaawe aamo neesetoka mochtosaa eemea, Riosie Weratiame nakiya yoorame enemapua, aaata ku'ipuawichioopua. ³Aaata te'ta ki ahpo ki kaawerumachi wichimio e'ramea, wa'a e'ramea, ahpo wa'api wisikuamepua. Aaata kihta ahpo tuuyepo maayamea, iinuekaitepua aaatae ahpo tuuyeka chaanepuao, wa'a e'raka ahpo wa'api wihkuamekapao. ⁴Aaata ahpo piirechi ku'inariame enesaa, ahpo wa'api Riosichi kaawe tiakamera ne'nemetepua pahchao, aaata piirechi ku'ipuawichioopua. Kaawe ahpo teeresoopua Riosichio, kaawe erametepua aaata piirechi ku'ime tiapao. Nape puuuu aaata ku'ikaiopua, ki ahpokamera epeche werumako erametepua aaatachio. ⁵Yooma aaata pipiripi teeme, ahpo Riosichi kaawe teereme tiia, yorameripua, ki aaata piirechi ku'iwa iintoria wa'achi iintonareka. ⁶Ehpeo te'ta aamo inatepajeraninia i'ka: Yooma aaata Riosi kaaweruma tuuyewari masitiameraa, ahpo masiterae ku'ipuamepua, ihta koameeo, ihta nakiwaeoi.

⁷Piirechi tuuyewari aamo kiamania tiameo, puuuu ihjipua: Ka'te wihkuenaremitia eemea Riosio. Riosi wihkuenariamea, ahpo wa'apikamera wihkuamepua. Eemea ihta aamo echaria, pu'ka echitiame i'ipameripua. ⁸Ahpoche ki kaaweruma ikotuwa teerewa echakamea, ahpo ki kaaweruma ikotuwa taakeriache i'ipamapua. Puuu echakame waikao, te'ta poanatakame enemeripua Riosichio, mukukamechitia Riosiwichioo. Nape Riosi Riosiwari pu'seria echakamea, kaaweruma ahpo iintoria i'ipamapua, Riosikamera pu'seria. Puuu Riosi pu'seriakamera echakamea, ki wahjiamera ahjari i'ipameripua. ⁹Wa'a teeresoo, ki nahsinapamete teemea, aaata taamo kaawe yoorao. Wa'a taamo te'teretosoopua, i'ipapuame asisoopua, taamoo uumerikopua Riosie taamo kiapuameopua, Riosie taamowichio nuuteniameo. ¹⁰Wa'a teesoo waikao, senepi aaata ku'ime teeresaa, ku'ipuapua, aaataoi, nape te'ta Riosichi paparameo.

Kajuyachi wa'asi tuuyewari

¹¹Nee, no'o cheriwepuapua no'o weeweruma iyoterioipua, no'o wa'api sekaeo. ¹²Puuu aamo eina nokayamea, aamo siichitepuwaka

mochijeramea, oowera i'isaeri ti'tijoeriwachi kaawe itipinaria nokayamepua puuua, oowera Moise nuurarichi aamo kaawe te'teretomichio chaachapamepua, ki ahpo wepupuawichio pua i'isaeri ahpo siichitepuwa nokayameopua. Puuua ki masitenariamepua Eesusi Riosie Weratiamechi simiyamepua, ki ahpo kokosa tiame aiwatepuawichio pua. ¹³Nape yooma puu ahpo siichitepuwa nokayameai, ki ahsieme yooreka mochikamekaipua, Moise nuurario. Aapoea oowera aamo utewa yoorame puuua, aamoo siichitepuwa nokisisoopua, ahpo aiwenariapa aamoo utewachi ahpo nokiwa nokayame, enepateriapa. ¹⁴Nape neea noochi wa'apio, kihta oisa e'ramenia ihtoiopua, Riosie Weratiame iintoriakamera oisa e'ramenia, no'owichio kurusichi mukukamekopa. Yooma i'ka wehjoarichi ki ka'karuma nokinarewaa, mukukame puuupa noochio; i'ka weechi ki ka'karuma nokiwameonia, ki pu'seriamenia, mukukamepua wa'asi no'o pu'serepuawichio. ¹⁵Teemea Riosie Weratiamechi kaawe te'teramea, siichitepuwa nokiwamea ki siichitepuwa nokiwameopua tiameo, kihta nateyamepua wa'asio, taamowichio; taamowichio te'ta nateyameraa, weemera ahjarikamera puuua, te'ta ka'karumakamera taamo eneparia Riosichio.

¹⁶Ehpeo neea yooma no'o tiiachitia te'terameopua Riosichio, taamo Noono tewekachi kahtiameo amochi teewejeramenia, yooma amochi ta'iria mochiwa, tísia kaawe aamo yorawa iintowa. Wa'a aamoo yorajeriamenia Riosio, te'ta pichiwa Riosi mochiwarirakopa. ¹⁷Neeea ehpe waanamio, ki aatae a'chi chaaneme tiiamenia, se'wi no'o masitio tuuwaopua, Riosie Weratiamechi simiyameo, neea no'o weerewachio, naania tiamekopapua no'o wepiretiachio, pu'ka wepiretia no'o kokosa saaeria. Puu te'ta saaeria te'ta no'o ma'chitamepua, no'oo te'ta Eesusichi simiyame pichiwari masitiamekóo.

¹⁸Yooma eeme no'o Riosichi poponiwao pipiniwaopua tiameo, Apoe Eesusi Riosie Weratiame Paamiraopua, amochi yahchejerani neea, ahpo kaaweruma tesiwewaopua amochio, yooma aamo pipiripi iikachiopua. Wa'a ikisaa tísia kaawe enemapua. Cheriwema ehpeo, yooma i'ka no'o iyoteria keepuameo.